

तीतुं तीतुंक पौलुसना सिट्टि

इद सिट्टिता बारेमते गिचचो परिचयम
 रासतोना पोरोल: पौलुस
 रासता कालम: इसवि सन 60
 वेल्लेन देसेलकुने होंचि येसु सामिना बारेमता बेसता कबुरतुन कराहलय पेन
 पौलुसुंक आदेस हीता. पौलुस येस्सलेमते मननेके तीतु इनना वरोर लेय्योड ओनतोन
 मनुंदुर.

येसु सामि हासि मर्रा जीवाते तेदसि स्वर्गम होत्ता पजा, दग्गेर-दग्गेरा मुप्पै वर्साना
 पज्जो पौलुस इद सिट्टि तीतुंक रासतोर.

पौलुस आनि तीतु पेनदा बेसता कबुरतुन प्रचार कियालय केरेतु इनना सहर
 होत्तुर. केरेतु सहरते अंतोर विस्वासुल्क पूनोर्के मत्ताहेंका ओराहाटीं पेद्दाल्कुन
 निलाहनेके बव पोल्लेना अक्सरम मंता अव अन्नि पोल्लें पौलुस इद सिट्टिते
 रासतोर. अचोने आयका अगा तप्पुड बोदां कराहना गुस्ल्लकुडा मत्तुर.
 ओरा बोदानाल सततुन कापाळकुंचेंके ओर कराहना बोदान बल्हा आपाना इत्ता
 पोल्लेंगुडा पौलुस इद सिट्टिते रासतोर.

पेनदुन विस्वासम कीता लोकुल्क बल्हा आनि बद तरिकाते पिस्वर पिस्सना
 इत्ता पोल्लेंगुडा विस्वासुल्कुंक कराहनाहाटीं पौलुस तीतुंक इद सिट्टिते रासतोर.
 पेनदा इच्चा परकारम पिस्वर पिसानय्ते, पेनदाहेंदाल दोर्कना बस्केळ्ळक पिस्सना
 पिस्वर दोर्कता इत्ता मेन पोल्ले इद पुस्तकमते पौलुस रासतोर.

बगा बतल मंता

जोहार आनि परिचयम 1:1-4

कलिसियाता अदिकारिल्क 1:5-16

कलिसियाते बोन्क बद बोदा कराहना 2:1-15

बोदां आनि वेंरे वेहमळ 3:1-11

आकिरता बोदां 3:12-15

पौलुस तीतुंक जोहार वेहांतोर

1 नना पौलुस, पेनदा दासुन आनि येसु किरिस्तुना प्रेरित *आंदुन. पेन पेरता लोक्कुलकुना विस्वासमतुन बेसांगोटलय, ओर्क सत्तेमता बारेमते तेळियागोट्सि वेहालय नाकुन लोहमळ जर्गता.

2 ई सत्तेम, बस्केळक पिस्सना पिस्वरता आसे पोरो नील्सि मंता. बस्केने आबद्दम वळकुवा पेन इदुन हीतन इंचि वेल्लेन मुन्ने पोल्ले हीसि मत्ता.

3 बरोबर गावाले मत्ता वेलातेन पेन दाना पोल्लेन मनाकु वेहचि हुपिस्ता. इदे बेसता कबुरतुन वेहनाहाटी मनाकुन कापाळना पेन नाकु आदेस हीसि अप्पजेपता.

4 विस्वासमते नावा समानम मनना नावा मरि तीतुंक इद सिट्टि नना रासेक मंतन. पेनबाबनहेंदाल आनि मनाकुन पिसागोटनोर किरिस्तु येसुनहेंदाल नीकु कुर्पा, सांति दोर्किकांटी.

केरुतु दीबेते तीतु कियना कबाहक

5 क्रेति दीबेते, बव कबाहक अय्ते मय्सि मंतां, अव कबाहकुन सुदरांचनाहाटी आनि नना नीकु आदेस हीता परकारम निमे हरेक सहरते पेद्दाल्कुन निलाहना इंचि नीकुन नना अगा होळसि वातन.

6 निलाहना पेद्दा मनकनपोरो बदे दोसेम मननायो, ओन्क उंदे मुत्तो मनगोम. ओना मर्क-मियाहक विस्वासुल्क आसि ओर सिग्गु हिल्ला कराब कबाहक कियानोर, बोना पोल्ले केंजाकौटा मनानोर इंचि ओरापोरो तप्पु मनामनि.

7 बारित्ते आ अदिकारि पेनदा कबाटुन मुन्ने ताकसानोर आंदुर. अदुनहाटी ओनपोरो बदे दोसेम मननायो, ओर जिद्दि मनकल मनामनि, ओर बिराना होंगुंक वायानोर आयामनि, ओर कल्लु उनामनि, जगडाल्क कियामनि, तप्पुड कमाइ कियानोर आयामनि.

8 गानि आ अदिकारि हेडमितोन बेस हळकुनानोर आयगोम, बेस कियमळतुन पावरम कियानोर आयगोम, मनसुना आसेन आपिसि पीसि मनानोर आयगोम, ओर सादा-सिपल मनागोम, पवित्र आनि सततुन आपकुंचि मनानोर आयगोम.

9 इंका ओन्क कराहता सत्तेम पोल्लेतुन ओर विस्वासमते गाट्टिगा पीसि मनगोम. अल्हा मत्तेने ओर लोक्कुलकुंक सत्तेम पोल्लें वेहचि ओर्क कराह परीतोर आनि एदुर वळकानोरा तोड्डिड मुच्चा परीतोर.

* **1:1** प्रेरित इद पोरोल्क “पेन लोहचीतोर” इंचि अर्तम. येसु पन्नेड मंदितन पेरकुत्तोर ओर प्रेरितुल्क आंदुर. इच्चुर्कुन पेरसि किरिस्तुना बारेमते वेहालय लोहचीतोर्कुन प्रेरितुल्क इंचि इंतुर.

10 बारित्ते विसेस कीसि कतना कीतोरव्टेडाल वेल्लेटुर लोकुल्क मर्लाबळानोर, बतक ओज्जाकोन्ना वट्टिदे वळ्ळकानोर, दोका कियानोर वेल्लेन मंतुर.

11 ईरकुन वळ्ळकाकोंटा कियमळे गावाले. बारित्ते ईर लोकुल्क, बव पोल्ले अय्ते कराहना आयनो, अव पोल्ले कराहचि तप्पुड कमाइ कियनाहाटीं अन्नि कुटुंबाल्कुनंता पाळ कीतुर.

12 क्रेति दीबेतोर वरोर ओरा कबुरतोरै, “केरेतु दीबेता लोकुल्क बस्केळ्ळक आबद्दम वळ्ळंतुर, केडा जिवरासिनसंतोर, लंडु आनि तिडितोरै,” इंचि वेहतोर.

13 ओर वेहता गवाइ निजमे आंद. अदुनहाटीं आबद्दम बोदातुन नम्मना विस्वासुल्कुंक गट्टिगा वर्रै वेहा. अस्केन ओर सत्तेम विस्वासमते गट्टिपळांतुर.

14 यहूदिल्कुना तयार कीता वेसुडिन पोर्री विस्वासम ईर्राकोंटा, सत्तेमताल तप्पोत्ता मनकालोरा आदेसकुनाल लक्कु मनांतुर.

15 मनसु पवित्र मत्तोर्कुंक अन्नि वस्तुक पवित्रे मनंतां, गानि हेळसोत्ता मनसु आनि पेनदापोर्री विस्वासम हिल्वोर्क मात्रम बतले पवित्र मन्नो. ओरा मनसु, मनसु वेहता पोल्ले इव रोंडगुडा हेळसोंचि मनंतां.

16 पेन माकु एरपाटे इंचि ओर वेहांतुर, गानि ओरा कियना कबाहक हळ्ळते, ओर पेनदुन एरपाट किय्युर इत्तद दिस अर्रता. ओर हय्सवोर, वेहता पोल्ले कैजवोर आंदुर, ओर असल बदे बेस कबळ कियनालायक हिल्लुर.

2

बोन्क बद बोदा कराहना

1 निमे मात्रम बस्केळ्ळक सत्तेम बोदाकु ओप्पनालायक पोल्ले करहा.

2 ओप्केते, इमानदार मनमळते, सततुन आपकुनमळते, विस्वासमते, पावरमते, दैनेमते, ओर्सकुनमळते गट्टिगा मंदालय मातरलोर्कुंक करहा.

3 अल्हेने मातरिहकुंक करहा गदा, अवुना पिस्वर पवित्र लोकुल्कुना पिस्वरलेहका मंदना. वैरेतोर पोर्री दोसेल्क दोस्साकोंटा, कल्कु उनाकोंटा, अव बस्केळ्ळक बेसता बारेमतेन कराहगोम.

4 अल्हेने अव लेय्या मुरताहकुंक, अवुना मुय्दुर्कुन, पिलाल्कुन पावरम कियाना,

5 सततुन आपकुंचि पिस्साना, पवित्र मंदना, लोतुन आवरिचकुनना, दयाता गुनम मंदना, मुय्दोना पोल्लेपोर्री बेस मंदना, इंचि कराह. अल्हा कराहते, अवुनाहेंदाल पेनदा पोल्ले बदनाम आयाकोंटा मनंता.

6 अल्हेने लेय्युर्कुंक जोर हीसि वेहा गदा, ओर सततुन आपकुंचि पिस्सिरकांटी.

7 बेस कबाहक कीसि निमे अन्नि पोल्लेने ओराहाटी उंदि उदाहरनलेसी मन्नु. नीवा कराहमळ सत्तेम आनि लोकुल्लक बेस केंजनालायक मनगोम.

8 निमे कराहना बोदा इच्चोन सत्तेम मनना गदा, अवटे बोर तप्पु तेंडामान्नि आनि नीवा विरोदमते वळ्ळकानोर्कुंक मना बारेमते बतले तप्पु दोर्कका ओर्क सिग्गु वायगोम.

9 दासुल्लुकुंक करहा गदा, बस्केळ्ळ ओर ओरा माल्कुल्लुकुना पोल्लेपोर्री मंदना आनि अन्नि परिस्तितीने मालकुल्लुकुंक तिरियसि वळ्ळकाकोंटा, ओर्कुन कूस कियना.

10 इका मालकुल्लुकुनगटाल दोंगातनम कियामान्नि गानि अन्नि पोल्लेने बेस विस्वासमलायक ओर मंदना. अल्हा मत्ते, मनाकुन कापाळना मना पेनदा बारेमता कराहमळतुक ओर इकिच्चो कदर तराँनोर आंतुर.

11 बारित्ते अंटोर लोकुल्लुकुंक मुक्ति हियनाहाटी पेन दाना कुर्पातुन हुपिस्ता.

12 अद दया मनाकु, मनम पेनदुक नच्चुवा पिस्वर आनि सततुन आपकुंचि, इद दुनियाते बेस बक्तिते, सवरटा हर्दे आनि पेनदुक नच्चना पिस्वर पिसगोम, इंचि कराहंता.

13 अचोने आयका मना कदरगल्ला पेन आनि मनाकु मुक्ति हियना येसु किरिस्तु ओना महिमाते वांतोर इत्ता आ सक्कटा आसेतुन मनम एदुर हळसेक मंदना इंचेकगुडा कराहंता.

14 इका किरिस्तु मनाकुन अन्नि तीरकुना तप्पुड कबाहकुनाल तपिच्चि, बस्केळ्ळ बेसता कबाहके कियगोम इंचि मनसु इराना ओना सतता लोकुल्लक मनम आयगोम इंचि, मनाकुन पवित्र कियनाहाटी ओना सतता जीवातुन हीतोर.

15 इव अन्नि पोल्ले निमे पूरा अदिकारमते दटांचि तेळियागोटिस वेहा, करहा. नीकुन सिन्नगा बोने हळा हियमा.

3

पिसालय मंचि हर्चि

1 राज्येम कियानोरद आनि अदिकारिल्लुकुना पोल्ले केंजसि ओर वेहताप ताकना, इंचि लोकुल्लुकुंक मति कीसि हीम. इका कदरलायक मंदना हरेक बेस कबळ कियालय बस्केळ्ळ तयार मंदना.

2 बोर्कुने बदनाम कियानायो, बोरतोने जगडाल्ळ कियानायो, मेत्तटा गुनम मंदना आनि अंटोरतोनि सादा-सिंपलते कलियसि मंदना इंचि ओर्क वेहा.

3 मुन्ने मनमगुडा तेल्चि तक्कोतोरम, बोरदे पोल्ले केंजवोरम, वैरेतोरा पोल्लेने मुळ्गुतोरम, वैरे-वैरे इच्चां आनि सुकाल्कुना गुलामगिरि कीसेके मत्तोम. इंका होंगु-पगाते निडिस मत्ता पिस्वर पिसुंदुम, कळकु पोत्तुमळ, वैरेतोर मनाकुन हय्साकोंदुर, मनमगुडा वरोंक-वरोर हय्साकोंदुम.

4 गानि मनाकुन पिसागोटना पेनबाबाल ओना बेसतनम आनि पावरमते निडिस मत्ता दयातुन मनापोरों हुपिच्चि,

5 मनाकुन कापाळतोर. मनम कीता नीति कबाहकुनाहेंका ओर मनाकुन कापाळा हिल्लोर गानि ओना सतता दयाहेंदाले मनाकुन कापाळतोर. पूना रीतुने पुट्टना एर तुंगमळहेंदाल आनि पवित्र आत्मा मनाकुन पूनगा कियमळहेंदाल इल्हा आता.

6 ई पवित्र आत्मातुन, मनाकुन पिसागोटना येसु किरिस्तुनाहेंदाल ओर मनापोरों इरगा वळियतोर.

7 ओर इल्हा बारि कीतोर इत्ते, मनम ओना कुर्पाहेंदाल नीतिमंतुल्क आयगोम आनि बस्केळ्क पिस्सना पिस्वरता आसेते मनम ओना वारसदार्क आयाना इंचि.

8 इद पोल्ले निजम आंद. आनि निमे इव पोल्लें दटांचि वेहाना इंचि नावा इच्चा मंता. निमे दटांचि वेहतेने, बोर अय्ते पेनदुन विस्वासम कीतुर, ओर जेर्गताते मंचेके बेसता कबाहक कीसेके मनांतुर. बारित्ते इव अन्नि मनकालोरहाटीं बच्चोना बेस आनि पायदता पोल्लें आंद.

9 गानि अर्तम हिल्वा लोल्लिनाल, वंसाल्कुना बारेमता पोल्लेनाल, जगडाल्कुनाल इंका मूसाना नियमकुना बारेमता लोल्लिनाल निमे लक्कु मन. अव बतक ओज्जानव आयों, अवुनाहेंदाल बतल पायदा इंका वायो.

10-11 अल्हा चुगली कीसि वैरे-वैरे कियालय ह्ळानोंक, उंदि-रोंड मल्कां दटांचा. केंजाकोंटे, ओर मनकल हरि तप्सि पापम कीसंतोर, ओनद-ओरे दोस्सि इंचि हुपिच्चुंचंतोर इंचि एरपाट कीसि ओना दंटा होळसीम.

मतिते इर्नालायक कोन्नि पोल्लें

12 बस्के अय्ते नना, अरतिमास इनानोन हिलाकोंटे तुकिकुस इनानोन निहगा लोहकन, अस्के बल्हा कीसि अयना निमे, निकोपोलिस सहरते नाकु वासि कलियना कोसिस कीम. बारित्ते पीनि कालमते नना अग्गेन मनंतन इंचि निरनायम येततन.

13 जेनास वकील आनि अप्पुलोसुंक ओरा पय्नेमते ओर्क बतले तक्को होनाकोंटा ह्ळकुंचि, ओर्कुन साल्वा कीम.

14 अवसरालकुन दोर्किचकुननाहाटीं मना लोकुल्कगुडा बेस कबाहक कीसेके मनमल करियगोम, अल्हा कीते ओर पलम हियानोरलेहका मनांतुर.

15 नावातोनि मनानोर अंटोर नीकु जोहर वेहचंतुर, इंका विस्वासमहेंदाल मनाकुन पावरम कियानोर्कुगुडा जोहर. पेनदा कुर्पा मी अंटोरतोनि मन्निकांटी.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068